

薛立齋醫案全集

辛酉孟夏中澣
後齋署



外科精要上卷

宋臨江陳自明編

明吳郡薛己註

療發背癰疽灸法用藥第一

武進千鳳政重校

經云諸痛痒瘡瘍皆屬心火前輩又謂癰疽多生於丹石房勞之人凡人年四十已上患發背瘡宜安心早治此症如虎入室禦而不善必至傷人宜先用內托散次用五香連翹湯更以騎竹馬法或隔蒜灸并明灸足三里以發泄其毒蓋邪之所湊其氣必虛留而不去其病乃實故癰疽未潰臟腑畜毒一毫熱藥斷不可用癰疽已潰臟腑既虧一毫冷藥亦不可用猶宜忌用敷貼之藥閉其毛孔若熱毒便秘脉沉實洪數宜用大黃等藥以泄其毒後國老膏萬金散黃礬丸遠志酒之類選而用之

愚按前症若熱毒蘊於內大便秘結元氣無虧者宜用大黃等藥泄其熱毒若陰虧陽痿精虛氣怯脾胃虛弱者宜用甘溫之劑培其本源若瘡不焮腫不作膿者雖未潰仍須溫補若瘡已潰而腫不退痛不止者仍宜清涼之劑治之若病急而元氣實者先治其標病緩而元氣虛者先治其本或病急而元氣更虛者必先治本而兼以治標大抵腫高焮痛膿水稠粘者元氣未損也治之則易漫腫微痛膿水清稀者元氣虛弱也治之則難不腫不痛或漫腫腫黯不潰者發於陰也元氣虛甚理所不治若腫高焮痛者先用仙方活命飲後用托裏消毒散漫腫微痛者宜托裏散如不應加薑桂若膿出而反痛氣血虛也八珍散不作膿不腐潰陽氣虛也四君加歸芪肉桂不生肌不收斂脾氣虛也十全大補加薑桂補熱內熱陰血虛也四物加參朮欲嘔作嘔胃氣虛也六君加炮薑自汗盜汗五臟虛也六味丸加五味子食少體倦脾氣虛也補中益氣加茯苓半夏喘促咳嗽脾肺虛也前湯加麥門五味欲嘔少食脾胃虛也人參理中湯腹痛泄瀉脾胃虛寒也附子理中湯小腹痞足痠腫脾腎虛弱也十全大補加山茱山藥肉桂泄瀉足冷脾腎虛寒也前藥加桂附熱渴淋閉腎虛陰火也加減八味丸喘嗽淋閉肺腎虛火也補中益氣湯加減八味丸凡此變症皆因元氣虧損失於預補所致故丹溪先生云但見腫

痛。參之脉症虛弱。便與滋補。氣血無虧。可保終吉。旨哉斯言。蓋古今虛實不同。因時施治。不無少異。是集治論義志類此。

附治驗

上林陳靜涵面患疔。脉洪數有力。屬邪氣蘊結。余用清熱消毒散二劑。未應。或用黃芪肉桂等藥。二劑反益其勢。致耳目唇口俱腫閉。頭面如斗。由邪氣外實也。前脉按之無力。由元氣內虛也。連進托裏消毒之藥。及數砭患處。出黑血碗許。已而膿與腐肉并潰而出。復用托裏之藥。瘡勢漸愈。七日後復因調護失宜。以致煩渴不食。兩尺脉如絲欲絕。急用八味丸料煎服。其脉頓復。手足自溫。使非砭以泄其外。托裏散以補其內。八味丸以回其陽。則治之失宜。必致不救。慎之慎之。

憲副陳魯山。居官勤苦。勞傷元氣。背患疽漫腫。中央色黯。四畔微赤微痛。脉浮大。按之微細。左寸短而右寸若無。十餘日腫未全起。此病氣元氣虛寒。朝用參芪薑桂歸朮陳皮半夏炙草溫補其陽。夕用加減八味丸。滋其肝腎。各四劑而腐潰。但膿水清稀。盜汗自汗。內熱晡熱。脉浮而數。改用八珍湯。復發熱而夜陽舉。此腎虛而火動。仍用加減八味丸料煎服而安。又因怒動肝火。瘡出鮮血二盞許。左關弦數。右關弦弱。此肝木侮脾。以致肝不能藏血。脾不能統血。用十全大補。兼前藥各二劑而血止。再用前藥調理而痊。

一武職患腦疽。內潰熱渴。頭面腫脹如斗。胸背色焮如塗丹。煩熱便秘。此表裏俱實。若非苦寒之劑。內疎外泄不救。遂針周項出膿。及用清涼飲一劑。內大黃用五錢。再用消毒散而愈。

節推王器之背患疽瘡。頭如黍。焮痛背重。脉沉而實。此毒在內。服黃連內疎湯二劑。少退。更與仙方活命飲而愈。

舉人劉華甫。焮腫作痛。脉浮而數。此毒蓄於經絡。用內托復煎散二劑。而焮腫減。用仙方活命飲四劑。而腫痛止。更用托裡藥而痊。

一儒者患背疽腫焮痛甚此熱毒蘊結而熾盛用隔蒜灸而痛止服仙方活命飲而腫消要與托裡藥而潰愈。

一男子背患疽腐肉雖潰而新肉不生此毒氣解而脾胃之氣虛也用六君子加芎歸五味黃芪漸愈用十全大補湯全愈。

一男子背患疽肉腐膿清肌肉不生此邪去而氣血俱虛也用十全大補湯月餘而斂。

一男子背患疽腫痛赤暈尺餘背如負石其勢當峻攻其脉又不宜遂砭赤處出紫血碗許腫痛頓退更用神功散及仙方活命飲二劑瘡口及砭處出血水而消。

儒者周在魯懷抱久鬱背脊患疽肝脉弦洪脾脉浮大按之微細以補中益氣加桔梗貝母少用銀花白芷二劑肝脉頓退脾脉頓復乃以活命飲二劑膿潰腫消肝脉仍弦此毒雖去而胃氣復傷仍用前湯加半夏茯苓而愈用銀花白芷非為治瘡乃解患者之疑耳。

癰疽備論第二

初虞世云凡癰疽始作須以大黃等藥亟轉利之勿以困苦為念若與其潰爛而死不若利之而死況有生道哉古人立法率用五香連翹漏蘆等藥貧乏者單煎大黃湯以利之至於膿潰乃服黃芪等藥以排膿千金外臺備矣世以瘡發於外不行轉利而死者多矣悲夫。

愚按前症若腫高焮痛臟腑閉結屬內外俱實當用前湯瀉之若漫腫微痛臟腑不實屬內外俱虛當用內托補之若患腫無頭肉色不變當助胃壯氣令其內消若疼痛不止焮腫不消當用人參黃芪散以托裏排膿若飲食少思肌肉不生當用參芪托裏散以補養脾胃丹溪云癰疽因積毒在臟腑當先助胃壯氣使根本堅固次以行經活血藥佐之參以經絡時令使毒氣外泄治之早者可以內消此內托之旨也又云腫瘍內外皆壅宜以托裏表散為主如用大黃寧無孟浪之非潰瘍內外皆虛宜以補接為主如用香散未免虛虛之失蓋古今氣票不同治宜審之。

癰疽灸法論第三

陳無擇云癰則皮薄腫高疽則皮厚腫堅初發並宜灼艾惟癰膿成則宜針疽膿成則宜烙當審察其症疎利其毒補托其裏然癰疽冠於雜病之首治失次序多致枉夭故集得効灸法以貽學者庶不致妄熅愚按前症若發熱煩渴大便秘結者由邪蓄於內宜黃連內疎湯以洩內毒若頭痛拘急發熱惡寒者由邪客於外宜人參敗毒散以散表邪若腫痛焮赤發熱作渴此毒氣凝於肉裏宜仙方活命飲解散其毒若食少體倦發熱惡寒此中氣處弱宜六君子湯以補脾胃

騎竹馬灸法第四

治一切瘡瘍即用此法無有不愈其法令病人以肘凭几豎臂腕要直用篋一條自臂腕中曲處橫紋男左女右貼肉量起直至中指尖盡處截斷為則不量指甲却用竹杠一條令病人脫衣正身騎定前後用兩人扛起令病者脚不着地又令二人扶之勿令偃偻却將前所量臂篋從竹杠坐處尾骹骨盡處直貼脊背量至篋盡處為則用墨筆點定此只是取中非灸穴也却用薄篋作則子量病人中指節相去兩橫紋為則男左女右截為一則就前所點記處兩邊各量一則盡處即是灸穴兩穴各灸五七壯疽發於左則灸右疽發於右則灸左甚則左右皆灸蓋此二穴心肝所過之處凡癰疽皆心火留滯之毒灸此則心火流通而毒散矣起死回生之功屢試屢驗

愚按前症若毒既解而肌肉不生當求其屬而補之

男以左手女以右手先屈中指用薄篋量取中間一節兩橫紋盡處為同身一寸為則子



先從男左女右臂腕中曲橫紋起用薄篋一條量至中指齊肉盡處不量指爪為則剪斷



第三圖

先令病人脫去衣服以大竹杠一條跨定令兩人徐徐杠起足要離地五寸許兩傍更以兩人扶定毋令動搖不穩却以第一圖則子貼定竹杠從尾間起貼脊量至則子盡以墨點定記之非灸穴也此是取中穴止處却以第二圖取同身寸則取兩寸平摺自中穴量之以中分取兩傍各一寸方是灸穴也

論隔蒜灸得効第五

李氏云治疽之法灼艾之功勝於用藥蓋使毒氣外泄譬諸盜入人家當開戶逐之不然則入室為害凡瘡初發一二日須用大顆獨蒜切片三分厚貼疽頂以艾隔蒜灸之每灸三壯易蒜痛者灸令不痛不痛者灸之令痛瘡潰則貼神異膏如此則瘡不開大肉不敗壞瘡口易斂一舉三得此法之妙人所罕知若頭項見疽則不可用此法五府極觀碑載

愚按瘡瘍之症有諸中必形諸外在外者引而拔之在內者疎而下之苟或毒氣鬱結瘀血凝滯輕者藥可解散重者藥無全功是以灼艾之功為大凡灸法未潰則拔引鬱毒已潰則補接陽氣每治四肢患瘡氣血無虧者祇以前法灸之皆愈若中氣虛弱不灸而服敗毒之藥復傷中氣未有不敗者也其頭項患者亦宜灸之但炷艾宜小而少其壯數為善

背疽腫漫尋頭灸法第六

李氏云凡患背疽漫腫無頭者用濕紙貼腫處但一點先乾處乃是瘡頭可用大蒜十顆淡豉半合乳香錢許研爛置瘡上鋪艾灸之痛否皆以前法為度



愚按前症或附骨疽及臀腿諸毒初起未明者尋頭用灸多自內消其毒熾盛更服活命飲其功尤捷若氣血虛弱必以補托為主若背疽大潰欲驗穿透內膜者不可用皂角。噤法但以紙封患處令病者用意呼吸如紙不動者未穿透也倘用取嚏鼓動內膜反致穿透慎之慎之。

蒜餅施用分其輕重第七

伍氏曰凡用蒜餅灸者蓋蒜味辛溫有毒主散癰疽假火勢以行藥力有只用艾炷灸者此可施於頑疽痼疾之類凡赤腫紫黑毒甚者須以蒜艾同灸為妙。

愚按前法誠有回生之功若頑瘡痼疾脾胃虛弱營氣不能滋養患處以致寒邪內襲而不愈宜用小艾炷頻灸瘡口以祛寒邪補接營氣其內補之法說見首論及三十二論。

灸法要論第八

伍氏方論曰夫癰疽發背皆有所因前篇言之詳矣凡初覺赤腫先從背脊骨第二陷中兩傍相去同身寸各一寸五分名熱腑穴二處各灸七壯此能疎泄諸陽熱氣水無癰疽之苦或隔蒜灸不論壯數則邪無所容而真氣不損但頭項見瘡宜用騎竹馬法及足三里灸之。

愚按前論誠為良策其調理之法當求首論中。

史氏引證

甲戌年瘍醫常器之診太學史氏之母云內有蓄熱防其作疽至辛巳六月果背脾微痒瘡粒如黍灼艾即消隔宿復作用膏藥覆之暈開六寸許痛不可勝歸咎於艾適遇一僧自云病瘡甚危嘗灸八百餘壯方甦遂用大艾壯如銀杏者灸瘡頭及四傍各數壯痛止至三十餘壯赤暈悉退又以艾作團如梅杏大者四十壯乃食粥安寢瘡突四寸小竅百許患肉俱壞而愈。

愚按灼艾之法必使痛者不痛不痛者痛則其毒隨火而散否則非徒無益而又害之。

附治驗

秋官高竹真患背疽色黯堅硬重如負石神思昏憤可畏其親延評鄭沙村請同往治鄭云竹真先生湖廣某縣時以某河涉險不便竹真為整治有功其民為立生祠凡渡河者無不禱祭竹真患此悉疑立祠致祟余曰不然病因元氣虛寒積毒熾盛所致遂以枰蒜攤患處用錢大艾炷灸二十餘壯尚不知乃攤蒜補艾灸亦不知乃着肉灸良久方知再灸方痛內服參附大補之劑而起

癰疽灼艾痛痒論第九

伍氏曰凡治癰疽發背疔瘡不痛者必灸使痛痛者必灸使不痛若初灸即痛者由毒氣輕淺灸而不痛者乃毒氣深重悉宜內服追毒排膿外傳消毒之藥大抵癰疽不可不痛又不可大痛悶亂不知痛者雖愚按前論惟疔瘡一症其狀不一其色不同或如小瘡或如水泡或作痛或麻木或有紅絲或寒熱頭疼或嘔吐惡心或肢體拘急其候多端非前灸法并解毒之劑卒難濟事若不省人事或牙關緊急者即以奪命丹為末灌之若生兩足多有紅絲至臍生於兩手多有紅絲至心生於唇面多有紅絲入喉俱難治若針其紅絲出血多有生者若患於肢末之處毒愈凝滯藥難導達艾灸之功為大如妄服疎利之劑耗損真氣不惟無以去毒而害反隨之矣

附治驗

操江都憲張恒山左足次指患之痛不可忍急隔蒜灸三十餘壯即能舉步彼欲速愈自敷涼藥遂致血凝肉死毒氣復熾再灸百壯服活命飲出紫血其毒方解脚底通潰腐筋爛肉甚多將愈予因考續北上又誤用生肌藥反助其毒使元氣虧損瘡口難斂予回用托裡藥補之喜其果實且客處至三月餘方痊

表甥居富右手小指患之或用針出血敷以涼藥掌指腫三四倍六脉洪大此真氣奪則虛邪氣勝則實也先以奪命丹一服活命飲二劑勢稍緩余因他往或又遍刺出血腫延臂腕如大鉢手指腫大數倍不能消潰乃真氣愈虛邪氣愈盛余回用大劑參茸歸朮之類及頻灸遍手腫勢漸消後大便不實

時常泄氣。此元氣下陷。以補中益氣湯。加補骨脂肉苁蓉吳茱萸五味子。又以生脉散代茶飲。大便漸實。手背漸潰。又用大補藥五十餘服。漸愈。

一男子唇患之。有紫脉自唇延至口內。余曰。此脉過喉。則難治矣。須針紫脉。并瘡頭出惡血。以泄其毒。則可不信。乃別用解毒之劑。頭面俱腫。復請治。脉洪數。按之全無。惡症悉具。余曰。無能為也。彼求治甚篤。時口內腫脹。針不能入。為砭腫處出血。勢雖少退。終至不起。

腦疽灸法第十

李氏云。腦疽及脛項有疽。不可用隔蒜灸。恐引毒上攻。宜灸足三里穴。五壯。氣海穴。三七壯。仍服涼血化毒之藥。或以騎竹馬穴灸之。此頭項咽喉生疽。古法皆為不治。若用此法。多有生者。如五香連翹漏蘆等湯。國老膏。萬金散。皆可選用。

愚按前症。屬膀胱經。或濕熱上壅。或陰火上炎。或因濕熱。則病氣有餘。元氣不足。當用黃連消毒散。以除濕毒。用補中益氣湯。以滋化源。若因陰火。則元氣病氣俱不足。當用補中益氣湯。及六味地黃丸。以滋腎水。若腎水乾涸。中傳未症。急用加減八味丸。及補中益氣湯。以固根本。引火歸源。若色黯不潰。或潰而不斂。名曰腦爛。不治。大凡腫焮痛甚。宜活命飲。隔蒜灸之。解散瘀血。投引鬱毒。但艾炷宜小而少。若欲其成膿腐潰。生肌收斂。並用托裏為主。

附治驗

一婦人患頭項俱腫痛。不可當。發熱作渴。喜冷。內服清熱。外敷寒涼。色黯不斂。胸中氣咽。此陽氣虛寒。彼泥素有痰火。不受溫補。余用參芪各五錢。姜桂各二錢。一劑腫頰起而潰。又用大補藥而愈。凡瘡疽腫高痛甚。煩渴飲冷。此病氣元氣俱有餘。宜用清熱消毒散。仙方活命飲為主。若腫高痛甚。口乾飲熱。此病氣有餘。元氣不足。宜用托裏消毒散。參芪四補散為主。若漫腫微痛。食少體倦。此病氣元氣俱不足。宜用六君補中二湯。壯其脾胃。則未成者消。已成者潰。已潰者斂矣。

儒者胡本中之內。冬患之。腫痛熱渴。脉洪數實。用清熱消毒之藥。清膿而愈。次年三月。其毒腫大。遍身患紫疔如葡萄。不計其數。手足尤多。各刺出血。此脾胃受毒。先服奪命丹七粒。出臭汗。瘡熱益甚。便秘二日。與大黃芩連各三錢。升麻白芷山梔薄荷連翹各二錢。生甘草一錢。水煎三五沸服之。大小便出臭血甚多。下體稍退。乃磨入犀角汁。再服。古本及齒縫出臭血。諸毒頓消。更用犀角地黃湯而愈。

癰疽既灸服藥護臟腑論第十一

李氏云。背疽之方雖多。得効者殊少。今擇用驗者錄之。庶不致誤人。如護心散凡有疽疾。早進數服。使毒氣外出而無嘔吐之患。否則咽喉口舌生瘡。或黑爛如菌。若瘡發四五日之後。宜開用別藥治之。

愚按護心散乃解金石發疽之藥。若發熱炊腫作痛。飲冷而嘔者。宜用若脾虛停痰。或寒邪內侵。或痛傷脾胃。宜用六君子湯。若喉舌生瘡。或口乾作渴。或小便頻數。宜用六味丸。大凡諸瘡作嘔。若飲冷便秘。是熱毒也。黃連消毒散解之。飲冷便和。是胃火也。竹葉石膏湯清之。懶食飲湯。是胃虛也。補中益氣湯以補之。大便不實。喜飲熱湯。是脾胃虛寒也。六君加炮薑以溫之。常見脾胃虛弱者。用前散反心間陰冷。無不致嘔。其喉舌生瘡。乃腎水枯涸。虛火炎上。其証甚惡。急用加減八味丸。亦有得生者。

附治驗

通府王廷儀背患瘰作嘔。炊腫大便秘結。口乾作渴。此內蘊熱毒。用竹葉石膏湯。二劑諸症頓退。用托裏消毒散。四畔腫消。用仙方活命飲。瘡亦尋愈。

上舍李通甫。腿患瘡作痛。少食作嘔。惡寒。余以為痛傷胃氣。用六君子湯。加當歸四劑。疼痛少止。飲食加進。又以十宣散加白木茯苓陳皮數劑。膿成針而出之。又以前散去防風白芷數劑而痊。

舉人邊雲衢。腋下患毒。嘔逆不食。腸鳴切痛。四肢厥冷。脉沉而細。余謂中氣不足。寒邪內淫。用托裏溫中湯。一劑頓愈。更以香砂六君子治之。彼謂腫瘍時嘔。當作毒氣攻心治之。潰瘍時嘔。當作陰虛補之。

余曰此丹溪大槩之言也即諸痛痒瘡皆屬心火之意假如赤腫痛甚煩躁脉實而嘔為有餘法當下之腫硬不痛不潰脉弱而嘔為不足法當補之亦有痛傷胃氣或感寒邪被氣而作嘔者雖腫瘍尤當助胃壯氣彼執不信用攻伐之藥病愈甚復請診其脉微細而發熱余謂熱而脉靜脫血脉實汗後脉躁者皆難治後果歿

護心散 萊豆末一兩 明乳香細研半兩 右煎生甘草湯調時時與呷使藥常在膈間

五香連翹湯

乳香 木香 沉香 丁香 連翹 射干 升麻

黃芪 木通 獨活 桑寄生 甘草各三 右水煎服

愚按是方說見前論

凡癰疽不可用生肌飲口之藥合用麥飯石膏瘡口自斂或因毒藥或為刀割重者兼服沉麝湯

愚按前云凡瘡不可用收口藥者恐毒氣未盡反助其惡蓋肌肉脾之所主但托裏健脾則餘毒自解瘡口自合若毒發於外氣血無虧麥飯石膏亦可倚仗若元氣虧損必當補助其脾禁用刀針說見第四十三

沉麝湯

木香 麝香 沉香 藿香 乳香 連翹各等 右每服二錢水煎

五香去大黃加人參黃芪犀角湯

木香 沉香 乳香 丁香各五 粉草 人參各四 黃芪一兩

麝香錢一 犀角末錢二 右每服四錢水煎

漏蘆湯

黃芪 甘草 連翹 沉香 漏蘆各五 大黃一兩微炒 右每服二錢薑棗煎

愚按三方詳見首論其飲口之法附見第三十三。

柞木飲子治一切癰疽未成自消已成自潰甚効。

乾柞葉四兩 萱草根

荷葉蒂

甘草節

地榆略一

右每服五錢水煎一碗作二服早

晚進

愚按荷葉蒂去惡血萱草解毒柞葉善祛逐地榆甘草節清血消毒。

阿膠飲子治一切癰疽疔毒。

牛膠剉如粉 粉草略一

橘紅五錢

右作三劑水煎服

牛膠飲截治癰疽毒不內攻不傳惡症有益無損。

牛皮膠用明者

右用酒一碗重湯煮化服加酒至醉不能飲加白湯。

愚按二飲消毒殊有良驗。

神仙黃礬丸服至一兩以上最止疼痛不動臟腑。

白礬亮者

兩明黃蠟五錢黃色者焙開一方用七錢

右九桐子大每服十九漸加至二十九熟水或溫酒送下未破

內消已破自合如服金石所致更用礬末一兩徐以溫酒送下有人遍身生瘡其狀如蛇頭服此即効。

但日服百粒方能禦毒不致內攻又治蛇咬熔礬熱滴傷處痛即止毒即出。

愚按前法果有良驗余常以白礬三錢為末糊丸以葱湯連進二服其功尤速故名千金化毒湯本用礬末葱湯調末下因末難服故作丸此藥解金石固臟腑有益無損用力少而成功多偏僻之處不可不知。

國老膏治一切癰疽預服消腫逐毒其功不能盡述

粉草 右以河水浸二宿揉取汁砂器煎膏服一二匙無灰酒或白湯下最解丹毒。

愚按前方誠為解毒之劑但元氣虛弱者當深戒之。

萬金散治一切癰疽已潰未潰者。

括萆一箇 大甘草節錢沒藥研末 右用酒二碗煎一碗去渣入沒藥服

愚按前散有消毒破血之功無腐潰生肌之力。

遠志酒治一切瘡疽因憂怒氣滯所致

遠志未泔浸洗去土去心 右為末每服三錢酒一盞調和澄清飲之相數處

愚按遠志酒誠有解鬱消毒之功而無托裏補益之功

忍冬酒治一切癰疽其効仍以麥飯神異二膏敷貼

忍冬藤生取五兩 大甘草節兩 右用水二碗煎一碗入無灰好酒一碗再煎數沸去粗分三服一晝夜

用盡病重晝夜兩劑至大小便通利為度另用忍冬藤一把爛研入酒少許敷四圍

忍冬藤圖



又水蓮四十九片握去毛研細酒解溫服其功與忍冬草同

又龍鱗薜荔一握細研以酒解汁溫服利惡物為妙紅內消用水砂器煎熟入酒與藥相半再煎數沸去

粗時時服之粗焙為末酒糊丸桐子大每服三十丸空心溫酒下為常服之益力輕故也藥產建昌者良

愚按前三藥因其簡易解毒而用之略無內托之功也若毒既去而真氣虛者必須補托以收全功

馬益卿先生癰疽論第十二

論曰凡人有四肢五臟一覺一寐呼吸吐納精氣往來流而為榮衛暢而為氣色發而為聲音陽用其形

陰用其精此又常數之所同也至其失也蒸則生熱否則生寒結而為癰贅陷而為癰疽凝而為瘡癰憤則結癰怒則結癰又五臟不和則九竅不通六氣不和則流結為癰皆經絡澀滯氣血不流暢風毒乘之而致然也

愚按此論可謂盡言人身之造化瘡瘍之情狀者矣治法當參詳前論

癰疽敘論第十三

論曰癰疽之症若七情虧損氣血經絡壅結而成者屬內因若六淫外侵氣血受傷寒化而為癰者屬外因若服丹石補藥膏粱酒麪房勞所致者屬內外因也又曰陰滯於陽則發癰陽滯於陰則發疽脉浮洪滑數為陽沉緩遲濇為陰陰則熱治陽則冷治初覺宜清熱拔毒已潰宜排膿止痛故用遠志大黃甘草此三因之法也治當寒者溫熱者清虛者補實者瀉導之以針石灼之以艾炷破毒潰堅各遵成法以平為愚按前症脉沉實大便秘結者屬內因也宜疎利之脉浮大便秘調和者屬外因也宜托裏之脉不浮不沉者屬不內外因也宜調和榮衛此亦治三因法也若癰腫大痛煩熱飲冷大便秘結脉洪數實者為純陽宜苦寒之劑清熱拔毒若不腫不痛瀉利不食嘔吐足冷是為純陰宜辛熱之劑大補陽氣不拘嚴寒盛暑當捨時從症若微腫微痛似潰不潰時出清膿者為半陰半陽宜辛熱之劑溫補胃氣此亦治陰陽症法也治驗詳見首論

素問良用要論第十四

素問云陽氣凌襲寒化為熱熱甚則肉腐為膿凡發背多因服金石而發者有因上伐曾服而發者其候多發於脾起如粟或痛或痒多致不救外面如拳古人云外面如麻裏面如瓜有數十孔以手按之諸孔出膿尋時失瘡凡有此症可用淨土水調量大小作餅厚分許以艾炷灸之內服五香連翹湯及錢漿醋調蚌殼灰塗之更以騎竹馬法灸之甚良

愚按前症仍參首論主治恐其表裏熱毒之不同元氣虛實之不一也

千金良用備要方論第十五

千金云癰疽始發或大痛或小痛或發如米粒即便出膿宜急斷口味利其毒用騎竹馬灸法或就患處灼艾重者四面中央總灸一二百壯更貼寒藥其效甚速

愚按前症若因元氣虧損或因氣血相滯而患者更當調補其內

引脉辨症論第十六

伍氏云癰疽之疾有二十餘症燥發癰發石發岩發蜂巢發蓮子發椒眼發連珠發寬體發有腸癰內發腦背發眉發顴頤發肺癰瓜瓠發大率隨病淺深內外施治不可遲緩初發如傷寒脉浮而緊是其候也愚按前症其名雖殊處治之法詳具各論其肺癰胃脘癰別載外科樞要

癰疽脉症第十七

陳無擇云癰疽脉數身無熱反洒淅惡寒若有痛處乃發為癰以手掩上若熱者為有膿不熱者為無膿若脉不數不熱而疼者發於陰也尤為惡症凡熱甚脉數用漏蘆散并單者大黃等湯不甚熱脉緩弱投五香連翹湯仍依四節八事次序三因以藥之無有不濟者也

愚按前症洒淅惡寒有屬瘡之表邪者有屬脾肺之氣虛者若潰後焮腫作痛惡寒發熱煩渴脉數乃真氣虛而邪氣實也仍參詳首論主之

治癰疽用藥大綱第十八

李氏云余之所著方論靡不周備但欲使治者一玩味次第用之無有不効今略書用藥要領即次於後一初患癰疽便服內托散以免後來口舌生瘡仍用騎竹馬或隔蒜灸

一服五香連翹湯如大便疎快即止仍量人虛實

一癰疽潰後宜服排膿內補散若嘔逆用木香湯下

一癰疽初作便宜灼艾及麥飯石膏塗四圍中留口出毒如瘡小通敷之既潰用神異膏貼之

一癰疽已潰日用猪蹄湯淋洗將愈之際三日一次

一癰疽將斂宜用神異膏如毒未盡不可遽用生肌之劑

一癰疽將安宜用加味十全湯補其氣血庶肌肉易生

一背疽多先渴而後發或先疽而後渴不救多矣若服加減八味丸非特杜絕渴疾抑且大滋氣血生長肌肉

愚按前症及諸治法各附四十七等論當審用之

一癰疽嘔逆有二一因初發不服內托散伏熱在心一因脾氣不正若因伏熱在心者心煩身熱肢腫作痛宜用內托散三兩服若因脾氣不正者則不煩熱或聞穢氣作嘔宜用嘉禾散如有寒熱用不換金正氣散五更初兼服山藥丸以補腎

愚按前症治法當與第十一論參看

論癰疽嘔逆症第十九

李氏云癰疽嘔逆是毒氣衝心非脾胃之冷當服內托散楊氏云鼻衄初愈不曾表汗毒在經絡則背發大疽自肩下連腰脇腫硬如石其色紫黑以涼藥投之終夜大嘔連進托裏散嘔止瘡潰赤水淋漓四十日而愈又有患癰者痛過徹嘔服此即止今有病疽不服此藥者故引楊氏之言以解世人之惑

愚按用藥之法有是病必用是藥但今之脾胃虛寒氣逆痰滯而嘔吐者十居八九熱毒內攻而嘔吐者十纔一二當參首論及第十一論主之

論癰疽之源第二十

夫癰疽之源因於氣或因於熱以僕之管見亦有因於膏粱房勞金石等藥故治法用萊菔犀角礬石國老膏追毒丸其屬毒明矣華陀中藏所言是毒服宣熱敗毒之藥不必疑矣

愚按前症若因金石所致元氣充實者誠宜此法若膏粱積熱房勞過度脾腎虧損者當滋其化原不

可拘執

華陀論癰疽瘡腫第二十一

夫癰疽瘡腫之作。皆五臟六腑蓄毒不流。非獨因榮衛壅塞而發也。其行也有處。其主也有歸。假令發於喉舌者。心之毒。發於皮毛者。肺之毒。發於肌肉者。脾之毒。發於骨髓者。腎之毒。發於下者。陰中之毒。發於上者。腸中之毒。發於外者。六腑之毒。發於內者。五臟之毒。故內曰壞外曰潰。上曰從下曰逆。發於上者得之速。發於下者得之緩。感於六腑則易治。感於五臟則難瘳。又近骨者多冷。近膚者多熱。近骨者久不愈。則化成血蟲。近膚者久不愈。則傳氣成漏。成蟲則多痒少痛。或先痒後痛。成漏則多痛少痒。或不痛不痒。內虛外實者。多痛少痒。血不止則多死。潰膿則多生。或嘔逆無度。飲食無時。皆癰疽使然。症候多端。要當詳治。

愚按瘡瘍生蟲。乃肝經風熱。其成漏。乃元氣虛弱。其出血。乃脾虛有火。其潰膿。乃元氣充實。至於嘔逆等症。屬脾胃虧損所致。當補調元氣。庶保無虞。

論背疽其源有五第二十二

一。天行。二。瘦弱氣滯。三。怒氣。四。腎氣虛。五。飲冷酒。食炙博。服丹藥。

愚按前症所因雖殊。其治法亦當別經絡陰陽虛實。表裏腫潰。以助胃壯氣為主。使根本堅固。庶保無虞。

追毒丸

轉毒散

單煮大黃湯

神仙截法

秘傳連翹湯

千金漏蘆湯

六味車螯散

止痛靈寶散

神效麻仁丸

清心內固散

清腫竹葉湯

豬蹄湯

神硝散

聖効散

神仙陷脉散

右方見中卷

麥飯石膏

神異膏

神驗血竭膏

壓熱神白膏

牡蠣地黃膏

大川烏丸

二烏丸

蚣蝎散

琥珀犀角膏

犀角散

內托黃芪丸

不換金正氣散